



意林卷之五

錫山錢普以德校刊

周生烈子五卷



序云六蔽鄙夫燉煌周生烈字文逸張角敗後天下潰  
亂哀苦之間故箸此書以堯舜作幹植仲尼作師誠  
御馬失節其車是碎御天下失節四海失墜桀紂是湯  
武之梯秦項是大漢之階四逆不興則四順不昇賢  
哲不可以色貌誘之猶張羅恤鳳施竇誘麟伯樂相  
馬取之於瘦聖人相士取之於疎聽訟不如使勿訟

善斷不如使勿亂

理大綱伏八柄運元象撮衆有者天子也撫人物參天  
意者三公也執分節事修理者士也

人者天之舌物者神之口天高地厚報應故晚辭者主  
之弓弩教者君之機關

矜賞若春重罰若秋行禮若火流教若水讓一得百爭

十失九

荀悅申鑒五卷

序云夫道本仁義五經以經之群籍以緯之前鑒既明

今又申之故曰申鑒

君臣親而有禮百官和而不同此治國之風也禮俗不  
一庶人作議此衰國之風也君臣爭盟大夫爭名此  
乖國之風也上多欲下多端法不定政多門此亂國  
之風也以割下作能附上作忠此叛國之風也小臣  
爭寵大臣爭權此害國之風也上不訪下不諫婦言  
用內政行此亡國之風也

善禁者先禁身而後人不善禁者先禁人而後身三曰  
致武事四曰禁數赦

秦之滅學也書朽於屋壁義絕於朝野學聖不至聖可  
以盡生學壽不至壽可以盡命

君子有三鑒鑒乎前鑒乎人鑒乎鏡

下不鉗口上不塞耳則有所聞矣

思唐虞於上世瞻仲尼於中古乃知小道者足羞也思  
伯夷於首陽想四皓於南山乃知穢妄者足耻也存  
張騫於西極念蘇武於朔方乃知懷安者足鄙也

仲長昌言十卷

教化以禮義爲宗禮義以典籍爲本常道行於百世權

宜用於一時高辛已往則聞其人不見其書唐虞夏  
殷則見其書不詳其事周氏已來載籍具矣

後嗣愚王見天下莫與之違奔其私情騁其邪欲君臣  
宣淫上下同惡目極角觝之觀耳蒙鄭衛之聲入則  
騁於婦人而不反出則馳於田弋而不還信任親愛  
寵貴后妃命移運去不自知也

建旗伐鼓高烽明候守邊之猛將非中國之良吏和鑿  
法駕諸道而行便辟揖讓諸夏之威儀非夷狄之有  
也

董賢之於哀帝無骨肉絲髮之親又不能傳其氣類定其繼嗣以丈夫宴接之歡自成膠漆也人愛我我愛之人憎我我憎之

天下士有三俗選士而論族姓閥閱一俗交游趨富貴之門二俗畏服不接於貴尊三俗天下之士有三可賤慕名而不知實一可賤不敢正是非於富貴二可賤向盛背衰三可賤

知言而不能行謂之疾此疾雖有大醫莫能治也同於我者何必可愛異於我者何必可憎

附者不黨疎者不遺

婦人有朝哭良人暮適他土涉歷百庭顏色不愧今公侯之官美女數百卿士之家侍妾數十晝則以醇酒淋其骨髓夜則以房室輸其血氣

人之性有山峙淵渟者患在不通巖剛貶絕者患在傷士廣大闊蕩者患在無檢和順恭慎者患在少斷端殼清潔者患在拘狹辯通有詞者患在多言安舒沈重者患在後時好古守經者患在不變勇毅果敢者患在險害疏濯胃臆凜雪腹心使之芬香皓潔而不

可汚也道德仁義天性也織之以成其物鍊之以致其精瑩之以發其光幽暗則攻人之所短會同則述人之所長負我者我又加厚焉疑我者我又加信焉難必相恤利必相反

事君不爲君所用忠未至也與人交不爲人所信義未至也

英辭兩集妙句雲來命之自然也愜快以志人情之所欲也

嗽舌下泉咽之名曰胎食得道者生六翮於臂長毛羽

於腹飛無階之蒼天度無窮之世俗

北方寒而人壽南方暑而人夭如蠶寒而饑則引曰多温而飽則引曰少

湯契後秦益後益即臬陶子也

典論五卷

魏文帝

堯崩舜避堯子於南河之南舜崩禹避舜子於陽城禹崩益避禹子於箕山之陰事見史記

應瑒云人生固有人心荅云在親曰孝施物曰仁仁者有事之實名非無事之虛稱善者道之母群行之主

序云佞邪穢政愛惡敗俗國有此二事欲不危已不可得也

桓靈之際閹寺專命於上布衣橫議於下干祿者殫貨以奉貴要名者傾身以事勢位成乎私門名定乎橫巷由是戶異議人殊論論無常檢事無定價長愛惡興朋黨

夷吾侈而鮑叔廉此其志不同也張竦潔而陳遵汚此其行不齊也

主興民有三求求其謂已勞求其謂已死求其謂已生

法者主之柄吏者民之命法欲簡而明吏欲公而平

上洛都尉王琰以功受封其妻泣於內恐琰富貴更妻妾

荊州牧劉表跨有南土子弟驕貴以酒器名三爵上者曰伯雅受七升中雅受六升李雅受五升又設大鍼於杖端有醉者輒以劊刺之驗其醒醉

余喜彈碁畧盡其巧少嘗作賦昔京師有東方世安張公子嘗恨不得與彼數子對之

太子篇序云余蒙隆寵忝當上嗣憂惶踖上疏自陳

欲繁辭博稱則父子之間不文也欲畧言直說則喜  
惧之心不達也里語曰汝無自譽觀汝作家書言其  
難也

魏子十卷

源靜則流清本正則末茂內修則外理形端則影直  
天生君子所以治小人天生小人所以奉君子無君子  
則無以畜小人無小人則無以養君子  
錄人一善則無棄人採材一用則無棄材  
古有弟子病師數往看之師至弟子輒起因勞而致死

師非不仁弟子非無禮傷於數也薄冰當白日聚毛  
遇猛火雖欲遠害其勢不可蓼虫在蓼則生在芥則  
死非蓼仁而芥賊失於本不可也

諺曰已是而彼非不當與非爭彼是而已非不當與是  
爭

君子表不隱裡明暗同度

苦窮富貴之梯階

仲尼無契勝於天下而德著古今善惡明也鏡照醜好  
而人不怨法明善惡而人不恨



人物志三卷

劉邵

草之精秀者英獸之將群者雄張良是英韓信是雄

任子十卷

名爽

學所以治已教所以治人

喜能歌舞怒能戰鬪

一人之智不如衆人之愚一日之察不如衆目之明生於治長於治知世之所以治者君子也生於亂長於亂知世之所以亂者君子也若不知治亂之所因者凡民也

道德之懷民猶春陽之柔物履深水而不寒結木條而

不折

天之圓也不中規地之方也不中矩

山必有阜河必有曲江漢末流必有廻復

直木無陰直士無徒是以賢人直士常不容於世

登泰山見天下之大不察細者視遠故也處高位知人

主之貴不卹卑賤者意滿故也

治已審則可以治人治人審則可以治天下累世一聖是繼踵十里一賢是比肩

水可乾而不可奪濕火可滅而不可奪熱金可柔而不可奪重石可破而不可奪堅

諺云富不學奢而奢貧不學儉而儉人情皆能唯聖人能節之木氣人勇金氣人剛火氣人強而燥土氣人智而寬水氣人急而賊

神龍不處網罟之水鳳凰不翔罽羅之鄉賢人不入危國智者不輔亂君

蕭何守文法曹參務無苛相繼作相天下獲安武帝輕人命重武功飾宮室厚賦歛土地益廣德惠彌狹

篤論四卷 杜恕

水性勝火分之以釜甑則火強而水弱人性勝志分以利欲則志強而性弱

考實推行莫過於鄉閭校才選能莫善於對策

陛下謂以今世無良才朝廷乏賢佐豈可追望前世之稷契坐待後來之後又可能治乎

體論四卷 杜恕

不動如山難知如陰人有厚德無問小節人有大舉無訾小故隋侯之珠不能無類

夫人臣猶如土也萬物載焉而不辭其重水瀆汚焉而不辭其下草木植焉而不有其功夫行者榮辱之皂白君子居必選鄉遊必擇士至人之治也處國於不傾之地積政於萬全之鄉載德於不止之輿行令於無竭之倉使民於不爭之塗開法於必得之方庶民水也君子舟也水所以載舟亦所以覆舟

恕性疎惰但飽食而已家有書傳頗嘗涉歷父憂行喪在禮多愆孝聲不聞後除中郎又作黃門郎同朝友人問余志余荅曰見大臣論議或黨甲苦乙所親或

黨乙謗甲所親余處甲乙之間幸無毀譽耳

傅子一百二十卷

木大者發越小者敷揚土是人之母也故人有戀土之心

冠堯之冠行桀之行亦桀也服桀之服行堯之行亦堯也處市井之肆服君子之服在小人之中行賢哲之事猶夜行珮珠玉也亦灼然矣蜘蛛作羅蜂之作窠其巧亦妙矣况復人乎

黃金累千不如一賢人而無廉猶衣服之無殺食味之

無酸醜

智慧多則引血氣如燈火之於脂膏炷大而明明則膏消炷小而暗暗則膏息息則能長久也

雄聲而雌視者虛僞人也氣急而聲重者敦實人也

蒙恬築長城人不堪苦白骨山積乃有歌曰生男慎勿舉生女舖用舖不見長城下白骨相棖柱

作黃金者是方士取草屑合金燒之故草屑然金落下

太元經十四卷

望國楊泉  
字德淵

怒如烈冬喜如溫春

鸞雛鳳子養牲高峙隱耀深林不食滓穢

內清外濁弊衣裘玉

十里九坎牛馬低昂

天氣左轉星辰右行陰陽運度報返相迎

強望者亡掘強者折大健者跋大利者缺激氣成化湧

氣成雨濁霧成雪清露成霜

化清經十卷

濁者不信淵之清而甘濯其濁矣

動則虎發靜如鱗潛若彼赫赫若此洋洋

將飛者翼伏將奮者足跼將噬者爪縮將言者口默將  
文者且朴

鄒子一卷

欲知其人視其朋友疾藜在田良苗無所措其根佞邪  
在朝忠直無所措其身

寡門不入宿臨甑不取塵避嫌也

成敗志三卷

孫毓

水性雖能流不導則不通人性雖能智不教則不達學  
猶植也不學將落

密者天地之際會成敗之機要故陰陽不密者寒暑不  
能以成歲棟宇不密則九層不可以庇身

古今通論三卷

王嬰

崑崙東南方五千里謂之神州州中有和美鄉方三千  
里五嶽之域帝王之宅聖人所生也

倉頡造書形立謂之文聲具謂之字

中論六卷

徐偉長作  
任氏註

倚立而思遠不如速行而必至矯首而狗飛不如修翼  
之必獲孤居而願智不如積學之必達君子不卹年

之將暮而憂志之有倦

人之涉世譬如奕碁局不盡道誰無死地但不辛耳

唐子一十卷

名滂字惠澗生  
吳太元二年

舟循川則游速人順路則不迷

大木百尋根積深也滄海萬仞衆流成也淵智達洞累  
學之功也君子以道成冠以道成輿出門不冠則不  
敢行行非輿則不可步有父不能孝有兄不能敬而  
論人父子之義昆弟之節猶彎弓而自射也  
人性苟有一孝則無所不包猶樹根一植百枝生焉

或問齊桓晉文優劣唐子荅曰論功則桓兄而文弟論  
德則文兄而桓弟

大晉應期一舉席卷猶震霆摧枯千鈞壓卵無餘類矣  
人多患遠見百步而不自知眉頰知眉頰者復不能察  
百步也

君子守真仗信遭時不容雖有訕辱之耻幽垢之謗猶  
傷體毛耳

鷹隼群飛鳳凰遠遊小人成列君子深藏諺曰脂粉雖  
多醜面不加膏澤雖光不可潤草

古人目短於自見故以鏡觀形心短於自治故以禮自防

君子不以昏行易操不以夜昧易容夫自有高世之名必有負俗之累有絕群之節必嬰謗嗤之患白骨擬象魚目似珠遙聽遠望無不亂也

禍福相轉利害相生如循環而運九耳其作不可見其端不可覺

良將如山如淵人不知其感亦不知其歡  
暴至之榮智者不居守財不施謂之錢奴

佐闔者傷預事者亡

秦子二卷

欲顯白於雪中馳光於日下不可得也

顏彥先難云有味如醪而不醉人其味如黍飲之則醉何也秦子曰醉在小人不在君子吾欲錦中而紵裘不欲綉而麻裡猶論者寧匱於辭不匱於理

遠難知者天近難知者人

因斧以得柯因柯以成用種一粟則千萬之粟滋種一仁衆行之美備矣

鍼雖小入水則沉毛雖大入水則浮性自然也

梅子一卷

伊尹呂望傳說箕子夷齊柳惠顏淵莊周阮籍易地而居能行所不能行也阮籍孝盡其親忠不忘君明不遺身知不預事愚不亂治自莊周已來命世大賢其惟阮先生乎按其書晉人也

物理論十六卷

欲定天下而任小人者猶欲捕麀鹿而張兔罝不可得也

語曰上不正下參差古者所以不欺其民也割剥富強以養貧弱何異餓耕牛乘馬而飽吠犬棄干將而礪鉛刃也

論語聖人之至教王者之大化鄉黨篇則有朝廷之儀聘享之禮堯曰篇則有禪代之事夫文彩之在人猶榮華之在草

天地歲也先春而後秋人君之治也先禮而後刑救嬰孩之疾而不忍鍼艾更加他物以至死也今除肉刑者更衆何異服他藥也肉刑雖斬其足猶能生育也



張倉除肉刑每歲所殺萬計鍾繇復肉刑歲生二千人

今有弱子當陷大辟問其慈父必乞以肉刑代之苟可  
以生易死也有道之君能不以此加百姓乎蛇螫在  
手壯夫斷其腕謂其雖斷不死也

曹義曰繫馴駒以縲絆御悍馬以腐索今制民以輕刑  
亦如此也

但知管子借耳於天下不知堯借人心而後用其耳目  
昔燕趙之間有三男共娶一女生四子後爭訟廷尉

延壽奏云禽獸生子逐母宜以還母尸三男子於市  
塞一蟻孔而河決息施一車轄而覆乘止立法令者  
亦宜舉要

禮云繼父服齊衰

傅子曰毋捨已父更嫁他人與已父甚於兩絕天也又  
制服恐非周孔所制亡秦焚書以後俗儒造之

妄進者若卵投石逃誅者若走赴深

曄若春華之並發馥若秋蘭之俱茂

樹上懸瓠非木實也背上被裘非脊毛也此似而非

九日養親一日餓之豈得言孝飽多饑少固非孝乎穀  
馬十日一日餓之馬肥不損於義無傷不可同之一  
日餓母也

漢末有管秋陽者與弟及伴一人避亂俱行天雨雪糧  
絕謂其弟曰今不食伴則三人俱死乃與弟共殺之  
得糧達舍後遇赦無罪此人可謂善士乎孔文舉曰  
管秋陽受先人遺體食伴無嫌也荀侍中難曰秋陽  
貪生殺生豈不罪耶文舉曰此伴非會友也若管仲  
啖鮑叔貢禹食王陽此則不可向所殺者猶鳥獸而

能言耳今有犬齧一狸狸齧一鸚鵡何足怪也昔重  
耳戀齊女而欲食狐偃叔敖怒楚師而欲食五參賢  
哲之忿猶欲啖人而况遭窮者乎

見虎一毛不知其斑道家笑儒者之拘儒者嗤道家之  
放皆不見本也止響以聲逐影以形姦爭流蕩不知  
所止也

傅子云孟軻荀卿若在孔門非唯游夏而已乃冉閔之  
徒也

積薪若山縱火其下火未及燃一椀之水尚可滅也及

至火猛風起雖傾河海不能救也秦昭王是積薪而  
縱火其下始皇燃而方熾二世起風而怒也

秦人視山東之民猶猛虎之睨群羊何隔憚哉

范蠡字少伯楚三戶人也使起滅吳已後乘輕舟遊五

湖令人寫其狀恒朝禮之列山云徐人也

楚漢之際有好事者作世本上錄黃帝下建漢末班固  
漢書因父得成大孝養志其次養形志者盡其和養  
形者不失其敬割地利已天下讎之推心及物天下  
歸之以信接人天下信之不以信接人妻子疑之見

疑妻子難以事君君子修身居位非利名也在乎仁  
義

人皆知滌其器莫知洗其心君子審其宗而後學明其  
道而後行或云玄衡以善詩至宰相張禹以善論作  
帝師豈非儒學之榮乎

傅子曰學以道達榮不以位顯吾觀班固漢書論國體  
則飾主闕而抑忠臣叙世教則貴取容而賤直節述  
時務則謹辭章而畧事實非良史也

漢太宗除肉刑匹夫之仁也非天下之仁也不忍殘人

之體而忍殺人故曰匹夫

伊尹耕於有莘孰知非夏之野人呂尚釣於渭濱孰知非殷之漁者遇湯武文王然後知其非也面岐路者有行迷之慮仰高山者有飛天之志或乘馬乘車而俱至秦者所謂形異而實同也

若謂黃帝後方有舟楫庖羲之時長江大河何所用之經巨海者終年不見其涯測虞淵者終世不知其底故近者不可以度遠也

漢世賤輶車而今貴之

青與赤謂之文赤與白謂之章白與黑謂之黼黑與青謂之黻五綵謂之繡

逐兔之犬終朝尋兔不失其迹雖見麋鹿不暇顧也

漢高祖度濶而網踈故後世推誠而簡直光武教一而網密故後世守常而禮義魏武帝紀亂以尚猛天下修法而貴理

形自正不求影之直而影自直聲之平不求響之和而響自和德之崇不求名之遠而名自遠

西國胡言蘇合香是獸便中國獸便而臭忽聞西極獸

便而香則不信矣

必得崑山之玉而後寶則荆璞無夜光之美必須南國之珠而後珍則隋侯無明月之稱

相者曰三亭九候定於一尺之面愚智勇怯形於一寸之日天倉金匱以別貧富貴賤

光武鳳翔於南陽燕雀化作鷓鴣二漢之臣煥爛如三辰之附長天長平之卒磊落如秋草之中繁霜勢使然也

長人數丈身橫九畝兩頭異頸四臂共骨老人生角男

女變化何益於賢愚耶

豈有太乙之君坐於庶人之座魁罡之神存於正婦之室

傅子曰諸葛亮誠一時之異也治國有分御軍有法積功興業事得其機入無遺刃出有餘糧知蜀本弱而危故持重以鎮之

指南車見周官亦見鬼谷子先生作辯上下者莫正乎位興國家者莫貴乎人統內外者莫齊乎分宣德教者莫明乎學秉綱而目自張執本而末自從善賞者

賞一善而天下之善皆勸善罰者罰一惡而天下之惡皆除矣世質則官少時文則吏多有虞氏官五十夏后官一百殷有二百周有三百國典之墜猶位之不建名理廢也

以譽取人則權勢移於下而朋黨之交用以名進士則有德者未必授而凡下之人或見任也

人之性如水焉置之圓則圓置之方則方澄之則淳而清動之則流而濁先王知中流之易擾亂故隨而教之謂其偏好者故立一定之法

龍舟整檝王良不能執也騶騶齊行越人不敢御也各有所能構大厦者先擇匠而後棟材治國家者先擇佐而後定民

人之學如渴而飲河海大飲則大盈小飲則小盈大觀則大見小觀則小見

金以利用錢以輕流此二物饑不可食入粟補吏是賣官也罪人以贖是縱惡也

世富錢流則禁盜鑄錢世貧錢滯則禁盜壞錢

天子之害莫害於女飾盈一頭之飾盈千金之價婢妾

之服亦重四海之珍

公卿大夫刻石作碑鑄石作虎碑虎崇偽陳於三衢妨  
功喪德異端並起撞亡秦之鍾作鄭衛之樂欲以興  
治豈不難哉

賞不避疎賤罰不避親貴有常名而賤不得冒尊有定  
位而卑不敢逾高經之以道德緯之以仁義織之以  
禮法既成而後用之謂有孝廉秀才之貢或千里望  
風承聲而舉故任實者漸消積虛者日長

聞一善言見一善事行之唯恐不及聞一惡言見一惡  
事遠之唯恐不遠

懸千金於市市人不敢取者分定也委一錢於路童兒  
爭之者分未定也

三皇貴道而尚德五帝先仁而後義三王先義而後亂  
鴻毛乙羽在水而沒者無勢也黃金萬鈞在舟而浮  
者託舟之勢也

擬金人銘作口銘曰神以感通心由口宣福生有兆禍  
來有端情莫多妄口莫多言蟻孔潰河淄川傾山病  
從口入患自口出存亡之機關闔之術口與心謀安

危之源樞機之發榮辱隨焉

夫有公心必有公道愛已者不能不愛憎已者不能不憎

民富則安鄉重家敬上而從教貧則危鄉輕家相聚而犯上饑寒切身而不行非者寡矣

我欲戰而彼不欲戰者我鼓而進之若山崩河溢當其衝者摧值其鋒者破所謂疾雷不暇掩耳則又誰禦之吳起吮瘡者之膿積恩以感下也史記云吳起吮癰書戰目相見夜戰耳相聞得利同勢失利相救

傅子曰聖人之道如天地諸子之異如四時四時相反天地合而通焉

路不險則無以知馬之良任不重則無以知人之才君子相見非但與善將以攻惡惡不廢則善不興

瘳暑莫如親水救寒莫如重裘止謗莫如修身

小人耻其面不如子都君子耻其行不如舜禹故小人貴明鑒君子尚至言

射以平志御以和心書以綴事數以理煩

利如激風之至暴雨之集不論是非不議直曲期於不



窮激放必勝辯者別也言其善分別事類非謂言辭捷給而凌善人也

聖人蹈機掘朽織成天地使萬物順焉人倫正焉登高而建旗則所示者廣順風而奮鐸則所聞者遠非旌色益明鏗聲遠長所托得地而况富貴施政令乎良農不患疆場之不修而患風雨之不節君子不患道德之不建而患其時之不至

聖人之世不交遊也周道衰而交遊興古之交也近今之交也遠古之交也求賢今之交也爲名

多助者則稱賢才少愛者則謂不肖

馬必待乘而後致遠醫必待使而後愈疾賢者待用而後興理

意林卷之五 畢



